


9.26

8
1025



B. 568


211


251165

Neue Zeitung.

Warhafftige beschrei-
bung des gesprächs / so sich zwischen
dem Durchlechtigsten vnnnd Hochgebornen
Fürsten von Conde / vnnnd denen von der Königlichen
Majestat in Frankreich darzü verordneten Herren be-
geben. Daren auch die vrsachen / warumb jets
gemelter Fürst von Conde / vnnnd seine Mits
verwandte zur wehr gegriffen / an-
gezeigt werden.

Auß Französischer sprach
Verteutschet. Anno
1568.





Barbaffrige beschreibung des Bes
sprachs / so sich zwischen dem Durchleuchtig
sten vnd Hochgebornen Fürsten von Conde / vnd des
nen von der Königlichen Maiestat in Franckreich
darzú verordneten Herren / begeben. Darinn auch
die Ursachen / warumb jetzgemelter Fürst
von Conde / vnd seine Mitverwandten
zú der wehr gegriffen / an
gezeyget werden.

Lhat der Durchleuchtigst
Hochgeborne Fürst vom Conde /
samt den Herren / vnd denen vom Adel /
auch andern / so der reinen lehr des heyligen
Euangelij vnter dem gehorsam des Königs anhan
gen / alzeit wol gewünscht / vnd nach ihrem besten ver
mögen verschafft / das gemeiner friede vnd wolstand die
ses Königreichs befördert vnd erhalten werden möchte /
Welches sie gnügsam mit allen iren thaten erwiesen vnd
zú erkennen gegeben. Insonderheyt aber im Jar tausent /
fünffhundert / sechzig vñ zwoey / da sie sich so manlich dem
shedlichen vorhaben vñ verbündnussen etlicher / so dem
gemeinen frieden zú wider waren / vnd der König. Mai.
person / auch dero selben satzungen vnd Edicten gewalt
anthenen / widersetzt haben / vnder welchen als der meh
rer theil auß gerechtem vrtheil Gottes in den entpörun
gen / deren sie doch selbs ursach vnd anfenger gewesen /
vmbkommen / vnd also auch die verhinderung des fridens
A ij auffges

auffgehabe worden/ So hat hochgemelter Prinz vn̄ die
andere/ so mit ihme versamlet/ als bald den König/ vnd
Königin vnterthenigst gebetten / dz sie alle auffhür vn̄
empörungē wolten auffheben/ vnd frieden verschaffen.
Vnnd hat Hohermelter Prinz von Conde / sampte ges
dachten seinen Mituerwanten / sich so weit eingelassen/
vnd erbotten/ solche Gesetz vnd Edict / wie es der Kö
niglichē Mai. zū ordnen gefällig/ anzunemen/ ob wol/
angesehen ihre grosse macht / so damals beysamen / sie
wol ein mehrers erlangen/ vnnd zum wenigsten mit gū
tem füge begeren konten / daß das Edict im Januario
ausgangen/ gehandhabt würde/ Welches Edict sampte
der Königlichen Mai. person vnnd authoitet zū erhal
ten/ inen gebotten war worden (wie sie dan̄ sonsten zū
eh̄n̄ verpflicht) zūr wehr zū greiffen/ Nach der selbigen
zeit haben diejenige / so noch von vorgemelter Coniura
tion vnd verbindnus vberig / vnd bey der Königlichen
Mai. waren/ auch weder frieden noch krieg leiden mocht
ten/ niemals vnterlassen mit allem vleiß vn̄ argen listen/
die siemur erdencken können/ ihre rottungen zū bestetigē/
vnd die Keyne lehr/ auch alle so derselben anhengig / zū
zerstören/ vnnd das Edict des Fridens zū vernichtigen/
Vnd haben kein gnügē daran gehabt/ das sie das Edict
dermassen beschnitten/ vnd mit ihren erklärungen vnnd
Modificationem zū nicht gemachet/ das im allein d̄ blö
se namen vnd ein geringer schatten vberblieben / sonder
haben auch alle die ihenige/ so der reynen lehr zū gethon/
mit vntreglichen beschwerden/ vngleichheit/ vngunst/ vns
gerechtigkeit vnd öffentlicher Tyranny zū vntertrucken
vnderstanden / vnd miterweil des Königs einkommen
vnd

vñ seine güter verschwendet / das volck mit newē scharzungen beschweret / vñnd an allen Stenden dieses Königreichs gewalt geübet / Welches doch der hochermelte Prinz vñnd andere / so hohe ämpter in Frankreich tragen / Herren / vñnd vom Adel / auch andere offtermelter Religion anhengige / nichts desto weniger (wie jederman leichtlich abnemen kan) lange zeit mit standhafftiger gedult erlitten / vñnd sich dermassen verhalten / das / ob sie schon ein vnleüdliche Tyranney vñnd vñndordnung in der Regierung des Königreichs spüreten / vñnd auch gewiß wußten / das die Rathschlege / so ire feind (welche sich des Königs jugend mißbrauchten) sie zü vertilgen fürgenomen / vñnd tägliche Practicken / so sie mit den außlendischen Fürsten (welche von alters dieses Königreichs abgesagte Feind sein) machten / vñnd auch das Kriegsvolck / welches sie diesen Rahtschlag zü volbringen angenomē vor augen sahen / habē sie doch den gemeinen Friden / vñnd den gehorsam / so sie irer M. schuldig (mit welcher namen vñnd Auctoritet solche Rahtschläge bemāntelt waren) vil grösser geacht / dan iren vorstehenden fall vñnd verderben / vñnd kein ander mittel suchen wöllen / dann allein auff ihr scharz acht zü haben / biß das sie gnügsam / nicht allein durch schrifftten vñnd brieff / welche ihnen in ihre hend worden / Sonder auch durch viel gewisße beweisungen dier Rahtschläge erfahren / welche newlich zü Compiègne / vñnd in der ganzen Reise des Königs gen Marches vñnd Fere wider ir leben / vñnd in gemein wider alle die jenige / so die ware Religion bekennen / geschēhen sein / auch darumb denen zü Paryß die wehr wider gegeben worden / vñnd die Schweizer des wegen iren zug

ans Königs hoff zünamen / wie hochermeltem Prinzen
von etlichen derselben Schweizer hauptleuten / welche
zū ihm gen Vallerey kommen / angezeigt worden / Wie
auch eben die selbige / die sie haben annemen lassen / der
ausländischen Fürsten dienern solches wissend gemacht
haben / Desgleichen / das zū solchem vorhaben zwen
vñ zwenzig Fahnenreisigen / die vnter den andern sond
lich außgewehlet waren / haben sollen in irer rüstung ge
mustert werden / Vnd auff das sie irer gesuchten feinds
schafft vnd vnnötiger Kriegs empörung ein angemasten
grund hetten / vnd ihrer verfluchten verbündnuß ein
schein mechten / haben sie nicht allein fürsehung gethan /
das man im dem Parlament zū Rouan / vnd in den
grossen gerichts tügen zū Potiers / die mit recht fürnes
me vnd verurtheilet / so wider gemelte erklärungen ges
ehan hetten / Sondt sind auch zür selbigen zeit vil erdich
tes geschrey / vnd falsche aufflagen im Hoff vnter den
grossen Herren öffentlich außgebreitet worden / als ob
hochermelter Prinz von Conde / die Herren / vñ die vom
Adel / auch andere vorgemelte Religions verwandte / et
was wider den König vnd seine Hochheit fürzunemen
willens werē / also das one zweiffel nichts anders zū ge
warten / dann das man wider sie mit der Execution zum
baldsten würde Procedieren . Nachdem nun Hoch
ermelter Prinz / Herren / vnd vom Adel in die eufferste
noth / ihr leben / ehr / vnd güter / sambt der freyheit ires ge
wissens zūuerthedigen / getrungen / haben sie ihnen sol
ches zuthun gēzlich vñ schließlich / wiewol sehr vngern /
fürgenommen . Vnd dieweil es meniglichen kund war /
das ein solch gewlichs vnd Tyrannisch fürnemen von
ihrer

ihrer Mai. alter vnd angeborener gütigkeit nicht hat Kön-
nen herfließen / Sonder das die von Guise solches für-
nemens vrsach vnd anfinger weren / als die solch giffte
der empörungen vnd zwitterchts / so bald sie an hoff kom-
men / angebracht / welche / damit sie auch diese verbünd-
nus vnd Coniration wider die gemeyne vorgemeldte
Religions sache desto besser vermänteln könnten / erneuer-
ten sie den Privat handel / so von wegen des Herzogen
von Guise todt sich angefangen / vñ richteten denselben /
als bald das Edict des friedens außgangen / wider den
Herren Amiral in Franckreich / listiger weiß solchē han-
del zu irem farnemen zu gebrauchen. So hat aber d̄ Herz-
Amiral auß racht gedachts Herren Pünzen (welcher
jetz gemelte sache für ein gemeine sache helt / die ihne selbst
vnd alle Religions verwanten anrühret) gehn hoff ges-
schickt / vnd dem Herrn Conestable die trewung vñ an-
schläge deren von Guisen zu wissen gethon / welches er
von den Fürsten / Rittern / vnd Edelleuthen der Röm-
schen Religion erfahren / vnd ihme hierneben zu verstes-
hen geben / Diweil sie das Edict vnd sartzung von der
Königlichen M. zu Moulins gegeben / nit halten (Den
weder der Herr von Guise / noch die von seinem ge-
schlecht so bewaffnet bey der handlung / da diese sartzung
gemacht / nicht sein wollen / ob sie schon nicht weit von
dannen waren / vñ allwegen angezeigt / wie sie darin nit
bewilligten) das er entschlossen sich dieses lastes vñ anlis-
gens zu entledigen / vñ wo sie würdē zehen meil reisen ine
zu suchen / wolte er ihnen dreißig entgegen ziehen / vnd
lieber alle mittel für die hand nemen / damit er sich möch-
te fürsehen / dann das sie ihme solten zu vor kommen /

Vnd

Vnd endlich gebetten / das sich vorgemelter Herz Con-
nestable nicht wider in wolt lassen gebrauchen / Auff wel-
ches fürbringen der Herz Connestable (welcher sich / das
er obgemelter verbündnus anhengig were / albereit er-
kleret hatte / dan er von wegen der Schweizer ankunfft
stolz vnd vbermütig war) kein güt willige antwort gas-
be / sondern trewet / er wolte die Schweizer / das Frans-
zösisch kriegsvolck / vñ alle macht des Königs mit sich
nemen / vñnd Vallerey / Chastillon / vñnd andere Edel-
leuth heuser / so der reinē Religion anhengig / damit auß-
tilgen / nach dem befelch / so er schon zwey oder drey mal
von irer Mai. empfangen / vñnd redet also den von Guise
zū gunst / als wann der König sich aller irer hendel vnd
feindschafften solte vnd müste annemen.

Als solches Hohermelter Prinz / auch andere Herz-
ren vñnd die vom Adel verstanden vñnd merckten / das
man ihnen an ihr eh: so scharpff gegriffen / haben sie
kein bessern weg gewußt / diesem vbel vnd trübsal / das
sie schon vor augen sahen / zū begegnen / dann als bald
sie sich zū ihrer Mai. mit einer gütten anzal Edelleuth zū
begeben / vñnd irer Mai. solche vnderthenigste reuerenz
zū erzeigen / wie ein Herz von seinen gehorsamen vnter-
thanen zūgewarten / vñnd dere hiemit die falsche auffla-
gen vnd Practicken deren von Guisen vnd derselben an-
hengigen zū erkennen geben / vñnd zūgleich ein Suppli-
cation zū vberreichen / Welche sie auch als bald auff
papyr brachten / darinn sie an ihre Maiestat begereten /
das ihnen widerumb erstattung gethon / vnd irer ehren
ergentzt werden möchten / vñ im endlich beweisen / was
für vbel / jamer / ellend auß solchem greulichen gefahrli-
chens

them rathschlag seinem ganzen Königreich erfolgen
würde / wann so viel fromme / nutzliche / vnnnd getrewe
ihrer Maiestat vnterthanē / so der reinen lehr: verwandt /
verderbt würden / Vnd dieweil sie wusten das ire feinde /
die stehets vñ vnd bey irer Maiestat waren / ihnen nims
mer keinen sicheren zügung zu ihrer Maiestat gestatten
würden / haben sie zu mehrer sicherheit irer personen sich
etlicher massen zu bewapnen fürgenomen / vñ also auff
ehest zu ihrer Maiestat zukömen / vnd obgemelte noth
wendige sachen außzurichten / verhoffend / obgedachte
ihre feinde zu Hoff anzutreffen / vñ sich denselben vnter
augen zustellen / Also das sie den 27. Septembris gehn
Kozoy kommen / da der Herr Marschalck von Mont
morancy zu ihnen auß befehl der Königlichen Maiestat
kommen / von ihnen die vrsach irer zukunfft mit einem
solchem grossen gerüsten zeug zu erfahien / Darauff sie
gedachten Herrn Marschalck gebetten / ihre Maiestat
von wegen des Prinzen von Conde / vnnnd aller die mit
ihme waren / anzuzzeigen / das sie nichts anders im wil
len hettē / dan irer M. obgemelte Supplication in aller
vnterthenigkeyt zu vbergeben . Vnnnd das sie ge
wapnet weren / geschehe allein der vrsach vnd meinung /
das sie irer person vor gedachten iren feinden desto sich
erer sein möchten / vñ protestierten hiemit vor Gott / das
sie niemals anders gesinnet gewesen / denn ihrer Maie
stat allen vnterthenigen gehorsam zu leisten / Vñ damit
ihre Maiestat dessen möchten verstendiget werden / ehe
vnd zu vor sie sich zu derselben gehn Meaur verfügten /
seind sie zu Kozoy etwas lenger verbliben / dann sie
willens gewesen / damit der Herr Marschalck desto
B mehr

mehr zeit / vnd bessere gelegenheit obgemelte sach anzubringen / welchen sie mit den seinen damals wol bey sich behalten hetten / wann sie vorhabens gewesen / ire Maiestat vnuersehens zu vberfallen / vnd sich dero Person mechtig zu machen / wie die von Guise / (welche von der zeit / wie meniglich weyß / solches gethon haben) vns das selbig felschlich aufflegen / Als aber der Prinz vō Conde vñ seine mituerwante vō gedachtem herrn Marschalck vernommen / das die von Guise von hoff abgezogen / haben sie sich deswegen sehr bekümmert / in betrachtung / die selbe allein vrsacher / das sie auß ihren heusern gezogen / obangerigte anklagen vnd verbündnuß vrsacher mit recht farzunehmen. Demnach nun der König solches / wie obuermelt / vernomen / haben ire Maiestat auß rath der jenigen / so die selbe bosshafftlich in dem verdacht vnd mistrawen wider den Prinzen von Conde / vnd alle Religions verwanten alwegen gestreckt / sich vmb die drey vñ nach Mitternacht auffgemacht / vñ in die Statt Paryß begeben. Da aber der Prinz von Conde vnd seine mituerwanten solches zwischen neun vnd zehen vñen vor mittag gewar worden / haben sie ihre reiß volnstreckt / in meinung jr nachtleger zu Claye zu haben / Denn sie meinten der König were gar nahe bey der Statt Paryß / welchen sie doch nicht gemerckt haben / wie ihre feinde außgeben / (Sonst hetten sie nicht vnterlassen gemelte Supplication / dere in solcher vnterthenigkeit / wie vnterthanē gegen irem König zū beweisen gepürt / zū vberantwortē) Aber war ifs / das ein teil der Condischen / die sechs tausent Schweitzer / so dem König nachzogen / antroffen / vñ wol lust gehabt / wann sie

ſie alle bey einander weren geweſt / gemelter Schwelger
anzugreifen vnd zu erlegen / als werckzeug / die man zur
Execution diſes böſen rahtſchlags vnd fürnemens hat
gebrauchen wollen / Als nun der Prinz von Conde vnd
ſein hauffen gen Claye kommen / ſind ſie daſelbſt drey
tag ſtill gelegen / Dahin der Cantzler / der Marſchall
von Vielleuille vnd Mortilir / vom König ſeind abge-
fertiget worden / Inen anzuzzeigen / wie ſre Maiestat ſich
befrembden / das ſie alſo nahe mit gewehrter hand inn
groſſer anzal zu derſelben kommen / ehe ſhre M. erfahren /
auß was vrsach / oder was ſhr begeren / vnd was ſie für
Klag hetten. Dann dieweil die Oberſten Fürſten gegens
einander nichts pflegen mit gewehrter hand fürzunema-
men / ſie haben dann vorhin die vrsachen / die ſie dahin
bewegen / einander erklärt / ſolten ja viel weniger die vn-
terthanen ſolches gegen ſhrem Oberherren / welchem ſie
zu gehoꝛſamē vñ unterthenig zu ſein / verpflichtet / unter-
ſtehn. Darauff hochermelter Prinz / vnd ſeine Mituers
wantre geantwortet / das ſie wider ſre M. vnd derſelben
Hochheit / deren ſie allen gehoꝛſam vñ trew zu beweifen
ſich ſchuldig erckenten / niemals zur wehr zugreifen be-
dacht gewefen / Sondern allein dieweil ſie ſhr ehr / leib
vnd leben wider die falſche aufflagen / vnd gefährliche
anſchleg irer feinde / die ſtets bey deren M. weren / zuuers
tedigen gezwungen / ihre reiſe dahin gewendet / das ſie
könten zu ihrer Mai. kommen / vnd derſelben klärlich zu
verſtehn geben die falſche anklagen / vnd von irer Mai.
begeren gerechtigkeit / vnd abtrag wider ſolche falſche
vnd argliſtige Practicken / vnd derſelben zu erkennen ges
ben / das die blütdürſtige anſchläge irer feinde / welche

B ij ſie

ſie mit dem namen vnd authoritet der Kön. M. beklei-
den / nichts anders dann ein vnuermeidlichen fall vnnnd
verderben dieſes ganzen Königreichs mit ſich bringen
könnte. Endlich haben ſie gebetten den obgemeltē Herrn
Cantzler vnnnd Marschalck von Vielleuille / das ſie ihre
Supplication / die ſie mit ſich gebracht hettē / annemen /
vnd von ihrentwegen der Kön. M. vbergeben wolten /
angesehen / ſie ſolche ſelbs zū vbergeben nicht gelegen-
heit hettē. Deren inhalt iſt wie volgt.

Supplication an die Königliche Maiestat.

Schuldigſter Herr König /
Ewer Kön. Mai. Vnterthenig-
ſte vnnnd aller gehorſambſte vnterthas-
nen vnd diener / die fürnembſte Fürſten
deren geblüts / auch ſonſt Herren / vom Adel vñ andere /
die in diſen L. R. M. landen / nach dem reinē wort Gots
tes / vñ ſeinem Euangelio vnter derſelben gehorſam les-
ben / Geben deren in aller vnterthänigkeit zū vernemen /
das / wiewol die warheit diſe krafft vñ eigenschaſt hat /
das ſie ſich ſelbs gnügsam zū erkennen gibt / wir nichts
deſto minder mit eußerſtem herzleid lenger nit gedulden
können die falſche verleumbdungen vnd aufflagen / mit
welchen die von Guiſe / als feinde der wolſart / rüh / vnd
fridens diſes Königreichs / durch geſchwinde vnd arglis-
ſtige

stige mittel vnnnd Practicken sie zů beschweren Begeren/
die boßhafftige vñ mißtrewige gedancken/die sie K. R.
M. teglichen vnter stehen einzů bilden / als solten ermelte
fürnembste deren blůtsuerwandte Fürsten / Edelleut /
vnd andere so der Religion anhengig / ihrer dermassen
selber vergessen sein / vnd ihrer vorälter Adenlichen her
komens / sampt der gebürlichen trew vnd gehorsam / das
mit sie K. R. M. als ihrer höchsten Obigkeit / vnd nat
türlichem Herrn verpflichtet vnd zůgethan seind / das sie
wider dero Person / oder derselben land vnd leuth / etwas
hettē fürnemen oder zůentgegen handeln wöllē / Dem
nach vnd dieweil sie zů besorgen / das mit der zeit solche
einbildungen etwan ein wurzelen / vnd ihre so gar lang
würrige gedult vnd stillschweigen / die ermelte von Guise
in ihrem bösen vorhaben stercken möchten / vnnnd darzů
dienen / das der gemeine mann / der für sich selber gar ge
neigt ist / solchen dingē glauben zů geben / für wahr hielt
alle diese erdichte aufflagen / vnd in sonderheit denen / so
jeder zeit von wegen der Religion ihres theils allen vñ
bel gewogen sein / die sich zů solcher bekennen. Dieweil
wir nun begeren / das man nicht allein mit augen sehen /
sondern auch mit den fingern greiffen möge / wie solche
vnd dergleichen anklagen vnd beschuldigung so gar keis
nen schein / viel weniger einigen grundt der warheit ha
ben / Sonder das viel mehr die vñ Guise selbs / da man
alle ihre verlauffne handlungen wolte erregen vnnnd er
wegen / mit solchen lasterhafftigen thaten / deren sie vns
falschlich beschuldigen / in warheit behafft bleiben / ha
ben die ermelte fürnembste blůtsuerwandte Fürsten / E
delleuth / vnd andere / so der Religion verwandt / genz

B. iij. lich

Wird darfür gehalten / Das sie nach Gott / zu niemands
anders / als zu E. K. M. ihren zůflucht haben können
oder sollen / ire billiche rechtmessige Klagen vnd beschwer
den fürzutragen / vnd dargegen solche gerechtigkeit vnd
straff der verwickler / wie sie verhoffet / vnd die sacht an ir
selber wol erfordert zu erlangen / Bitten E. Kön. Mai.
vnterthenigst / sie wölle doch bedencken vnd zu gemüt
führen / wohin das groß / embsiges / vñ vnfinniges nach
suchen vnd auffzeichnen der Genealogi vnd herkommen
deren vonn Guise thete gereichen / Dann sie damit zu
verstehen wöllen geben / vnd anzeigen / wie das sie vonn
dem geblüt vñ geschlecht der rechtmessigen Könige auß
Francreich herkommen / vnd wie die Kron von iren vors
ältern anderswo hin gewendt worden / also auch die ges
rechtigkeyt / deren sie sich anmassen vber das Herzogs
thumb Aniou / vnd die Grasschafft der Prouinz. Die
zweitachten vnd vneinigkeiten / so sie in diesem König
reich erweckt / vnd noch heutigs tags handhaben vnd
erhalten / als das einige vnd beste mittel / dardurch sie
zum zyel ihres ehigeizigen fürnemens komen mögen /
Die einbildungen vñ falschen erdichten aufflagen / damit
sie E. K. Mai. die ohren füllen / wider dere beste getres
weste diener vñ vnderthanen / welche zu erhaltung dera
person / leben / vnd hoheit wider solche tyranney vnd ge
walt ir leib vnd leben / güt vnd blüt nie gesparet haben /
insonderheit aber in den nechst verlossnen empörungen /
Vnd ehe sie mit dem wenigsten vonn dem gehorsam /
welchen sie E. Kön. M. schuldig / wöllen weichen / viel
lieber haben sie vnzehliche schmach / vbertrang / beleydia
gung / vñ allerhand vnbilligkeit mit einer vnberwunden
leben

lichen gedult ertragen vnd erleiden wollen / der hoffnung / es würde erwan die zeit eine linderung aller dieser vngemach vnd trübsals mit sich bringen / Dermassen / das leichlichen abzunehmen vnd zu vtheylen ist / da man sich anderst aller priuat affect gantzlich enteufferen wil / das die ermelte von Guise / hoch gemelten fürnembaften Fürsten des Kön. geblüts / Herrn / Edelleuthē / vnd anderen Religions mitgenossen einige vntrew noch vnehlliche that mag zugemessen werden / sondern allein das sie sich deren von Guise schendlichem verderblichen fürnemen dapper vnd ritterlich widersetzt haben / Welches dann billich als ein auffrichtige / redliche that bey aller nachkommen zu ewigen zeiten sol gepriesen vnd gelobt werden / Wiedann gleicher gestalt heutiges tags gemelte Religions verwandre / auch alle die / so etlicher massen zu erhaltung dieser Kron gewogen sein / möchtent nicht allein billicher weiß für meinaidig / sondern auch als veräter vnd trewlose leuth gehalten / vnd erkent werden / da sie nicht auff allerley mittel vnd weg / die ihnen Gott verleihen mag / sich mit gleicher dapperkeit vnd standhafftigkeit / den newen Practicken vnd anschlegen dere von Guise / so newlicher zeit der Cardinal von Lotringen durch heimliche verstendtnus / so er mit den außlendische hat / auff die ban bracht / widersetzten / die sonst anderst wo hin nicht dan zu vntertruckung vnd endlichem verderben dises Königreichs gereichen.

Derowegen vnd dieweil ermelte anklagen nicht einigen grund noch schein der warheit haben / vnd von gemelten klägern anderer gestalt nicht erdicht noch herfür gebracht

gebracht werden / dann dadurch E. Kön. M. getrew-
esten Dienern eben die mißhandlungen auffzütuchen/
mit welchen sie selbs behafft / vnnnd deren sie gnügsam
uberwiesen vnd straffbar seind. Derhalben so wölle E.
Kön. M. gnedigst verschaffen: dz solche vbelheter mit
ernst vnd nach der scherpffe / andern zum Exempel / ges-
strafft werden / der gepür vnnnd ebenmessig / wie dann
Hohermelter Prinz / sampt den Herrn / Edelleuthen / vñ
andern Religions verwanten züstraffen weren / da sol-
che Klagen vñ aufflagen / mit welchen die von Guise sie
vnterstehen zü beschweren / wahr weren. Vnd demnach
jetzgedachte von Guise nichts hinderlassen werden an
dem / was Hohermelten Prinzen / auch Herrn / vnd von
der Ritterschafft / so der reynen Religion sind zügethan /
beschweren vnd verunglimpffen mag / vnnnd das inson-
derheit wol werden wissen auff zümügen / das sie mit ge-
wehrtter hand sich zü E. Kön. M. verfügen wöllen / wie
es sich dann ansehen lest / das es einem vnterthanen mit
nichten wölle gebüren / mit gewehrtter hand vor seinem
Oberherren zü erscheinen / So bitten sie E. Kön. M. zum
vnterthenigsten / sie wölle das gnedigst bedencken vnd
zü gemüt führen / dieweil sie schon albereit der mißhand-
lungen / so inen von denen von Guise fälschlich auffge-
legt / als schuldig gehalten werden / vnd E. Kön. Mai.
durch ihr arglistiges vnnnd geschwindes angeben in ein
offentlich mißtrauen gegen ihnen erwachsen / vnd dero-
wegen sich auch mit außlendischem Kriegsvolck wider
sie / wiewol vnter einem andern schein / gerüst vñ gefast
gemacht / vñ dan auch drey vnterschiedliche Rahts ver-
samlungē vber sie gehalten / vñ mit allain zü Marchais /
sonder

sonder auch zu Monceaux entschlossen worden / Hoch-
ermelte Oberste Fürsten / sampt anderen fürnemen Her-
ren Religions verwandten / bey den helsen zu nemmen /
vnd in hafft einzuziehen / Wie dann auch newlicher zeit
bey E. Kön. M. dero wegen angesucht worden / durch
einen mit namen Ludwig von Gonzague / vñ erinnerung
geschehen / der zusag nachzusetzen / so sie dem König zu
Hispanien vorlangest gethan haben / Nemlich / das sie
die fürnembste Religions verwandte in hafft wolten
einziehen / vnd alle die außreuten / so sich zu gedachter
Religion bekenten.

Dero wegen sie ja weiter Keynen anderen weg fin-
den können / dadurch sie ohne eufferste gefahr ires leibs
vnd lebens sich zu E. Kön. M. begeben könnten / dann
allein durch die waffen vnd gewehete hand / deren sie
sich doch anderer gestalt nie wöllen gebrauchen / wie sie
solches vor E. Kön. M. gleich wie vor Gott bezeugen /
auch noch anders nicht zu gebrauchen gedencfen / dann
E. Kön. Mai. zu wolgefelligen vnd angenehmen dien-
sten / dere Kron vnd Hochheit damit zu erhalten / vnd
dere fürgeliebte fraw Mutter die Königin / auch gelieb-
te Brüder / vnd was dero ferners angehörig / zubeschütze-
en vnd zu beschirmen / Das sie auch hierinn nimmers
mehr bedacht auß der art ihrer Hochlöblichen vorältern
zuschlagen / deren redliche mannhait vnd trewe vom
alters her die Franzosen dermassen namhafft vnd be-
rümmt gemacht / das sie für andern Nationen dafür
gehalten / als die ihren Herren allwegen trew vnd hold
seyen.

Die obgemelte Herren Canzler vnd Marschalck
C namen

namen diese Supplication zu sich / vnd verbleffen sol-
che der K. M. zu vbergeben / lobten Gott / das der Herz
Prinz von Conde keiner andern visach / dann wie vor
gemelt / den hauffen zusamen bracht / Weren auch der
gewissen zuuersicht / ihre M. wüerden als bald durch gü-
te vnd bequeme mittel / dieser sach raht schaffen / vnd
solche fürsehung thun / das alles in vorige rühe vñ fri-
den bracht werde. Als nun der Prinz von Conde mit
seinen Mituerwanten in solcher hoffnung auff getha-
ne zusag vnd vertroöstung naher Sanct Dionys zu vera-
rucken vorhabens / auff das er vnd die seine der K. Mai.
etwz näher / dere genedigen willen desto ehe vnd bas ver-
nehmen / vnd da man einer frieds handlung pflegen wür-
de / sie desto fäglicher darzu dienen / vnd das ihre darzu
thun köntē. Ist ihme der Herz von S. Suplice des Kö-
niglichen ordens ein Ritter im zug auffgestossen / vnd
von der Kön. Mai. eine Credenzschuffte an Ihr. S. G.
bracht / allein mit dem befehl allen verdacht vnd arg-
wohn hinweg zu nemen / so Ihre S. G. möchte gefaßt
haben / als wolte man etwas thetlichs wider die Religio-
ns verwanter fürnehmen / Mit ferneren vermelden / das
ihre Mai. bedacht / in kurzem andere schickung abzū
ordnen / Ihrer S. G. vnd dere mituerwanten zu mehrer
versicherung / vnd auff mittel vnd weg zu handeln / wie
man die gemüter deren Mai. vnterthanen widerumb
möchte vereinigen. Solcher bottschaft wurden sie als
lesampt / vnd ein jeder insonderheit hefftig erfrewet / der
eröstlichen hoffnüg / es möchte ein gewünschter frid dar-
auf eruolgen. Des andern tags seind der Herz Canze-
ler / die Herren von Moutuilir / von Limoges / vnd von
S. Su

S. Suplice zu dem Prinzen von Conde gen S. Denys
abgefertiget worden / vnnnd nach vielen reden zu beiden
theilen von den trübsalen vnd jamer / so auß den Bür-
gerlichen krieggen pflegen zherfolgen / angezeigt / wie groß
begierd vnd verlangen ihre Kön. M. hetten / das diese
empörung / so newlich entstanden / gestilt / vnd das miß-
trauen / vnnnd aller mißuerstand / so ihre vnterthanen
gegen einander hetten / als der vrsprung aller zwiſtrachs
auffgehoben würde / damit hernach ein bestendiger vnd
güter friede in ihrer Mai. Königreich möchte angerich-
tet vnd erhalten werden / Es hetten auch ihre Maiestas
beswegen allbereit Brieff vnter derselben grossen Sec-
ret außgehen lassen / Vnnnd wurden gedachte Brieff
als bald von dem Herren Cantzler verlesen / Als solches
verrichtet / zeigt der Herz Prinz von Conde an / diese
Brieff theten ihrer Supplication / die sie ihrer Mai. vnt-
erthenigst vberantwortet / ganz vnd gar kein gnügen /
Sonder im widerspiel were deren inhalt anders nit als
ein verzieg der gethanen versamlungen / gleich als ob
sie daran mißhandelt / vnd straffbar weren / welches sie
doch nimmermehr gestehen würden / sondern gedachte
versammlung für ein redlich nothwendig werck hielten /
allein der Kön. M. zu diensten / vnd dero Hocheit dars-
durch zu erhalten gemeint / vnd fürgenommen. Dars-
auff vorgemelter Herr Cantzler ihnen zur antwort ge-
ben / ihre Mai. würden kein mißfallen haben / wann sie
derselben zu verstehen geben / was sie weiter begereten /
damit ihnen könne geholffen werden / Welches sie zus-
thun verheissen / vnd haben als bald nachuolgende Ar-
tikel in schriften verfasst.

Nachdem der Herz. Cantzler gestern den drittem
dies Monats im gegenwert des Prinzen von Conde/
der Herren / vnd anderer vom Adel / die bey ihm versamlet/
der Kön. M. offne brieff od Patenten verlesen/
vñ aber damit den puncten so in hievor vberschickter
Supplication begriffen / kein genügen beschehen / hat
ermelter Herz Cantzler ihnen auch ferners zu verstehen
geben / das ihre Mai. für gut angesehen / da sie etwas
anders hetten zu begeren / oder weiter anzudeigen / zu
hinlegung der Kriegs empörung / vnd bestertigung ge-
meines Friedens in diesem Königreich dienstlich / das
soltten sie eröffnen / damit man darauff solche fürscheidung
thun möchte / wie ihre Maiestät dasselbig für nötig / ge-
pürlich ansehen wurden. Der ursach haben ermelter
Herz Prinz / vnd seine Mituerwante nicht ombgehen
sollen / ihrer Mai. in aller vnterthenigkeit anzudeigen /
wie hernach volgt.

Erstlichen / dieweil der vrsprung vnd einige ursach
darumb man newlicher zeit in diesem Königreich zur
weh: gegriffen / allein daher kompt / das etliche bos-
hafftige leuth / die sich omb vnd bey der Kön. M. hal-
ten / durch falsche nachreden vnd aufflagen / die sie der
selben eingebildet / allerhand argwohn vnd mistrawen
gemacht vnd eriegt haben / wie dann ihre Mai. solches
gnügsam erzeigt gegen allen deren vnterthanen / so in
diesem Königreich nach der Reinen lehr: des Heyligen
Euangeliums zu leben begeren / Vnd aber durch die
geschwinde practicken / anschleg / vnd Kriegsrüstunge /
so man auffbrachte / vnd wider sie füret / in die enfferste
noch getrungen seind / darinn man sie jertz stehn siche / die
freyheit:

freyheit ihres gewissens / Leibs vnd Lebens / hab vnd
güter zuerretten. Derowegen bitten sie ihre Mai. gang
vnterthenigst / sie wölle gnedigst betrachten vnd ers
wegen / das kein besser / fürreglicher mittel / noch gewis
serer weg ist / alle sachen dieses Königreichs in sine güt
e richtigkeit vnd wolstand zubringen / vnd die vorige her
ligkeit / rühe vnd einigkeit widerum auffzurichten / als
das sich ire K. M. dermassen gegen dere ermelte vnter
thanen erzeigen / damit man spüren könne / das sie der
selben trew vnd redlichkeit in kein zweiffel setzen / vnd
alles mißtrawen fallen vñ hinweg gelegt haben / Wel
ches dan besser vnd füglicher nit kan geschehen / als wan
ihre Mai. kein außländisch vngewonliches Kriegsvolck
vmb dero person halten / gleich wie andere König dero
hochlöbliche vorfaren jederzeit gethan haben / Vnd
als denn dem Herren Prinzen vnd seinen Mituerwan
ten gebieten / das sie zu dero selben kommen / vnd gepür
liche Reuerentz vnd ehrebletung erzeigen / sie auch vmb
vnd bey dero Person halte / wie andere ihre Vntertha
nen / damit nicht allein alles ansehen vnd wohn eini
ges mißtrawens hinweg genommen / sonder auch als
ler verdacht vnd verläumbdung so villeicht sonst an vies
len orten bekleben möcht / erlöschten vnd auffgehoben
werde. Dann da sie nicht durch diß mittel aller schmach
entladen / vnd für solche / wie sie seind / erkandt solten
werden / nemlich für güt getrewe ihrer Mai. vntertha
nen / wolten sie viel lieber alle todt sein.

Derohalben / vnd dieweil solches mißtrawen vnd
darauff erfolgte kriegsrüstung allein eriegt vnd ents
standen durch die bößheit vnd anreizung deren von

Guise/ vnd anderer ih:er mit:erwandten / so dieser sach
vnd gemeines friedens alte abgesagte feinde seind / vnd
das durch ih: falsches erdichtes affterreden / vnd an:klas
gen / Hochgemelter Herz Pr:inz / sampt einer grossen an
zal deren vom Adel / an ih:ren Eh:en / Treu vnd Glau
ben zum höchsten verletzt vnd geschwächt seind / Zit
ten ih:re Ma:iestat sie vnterth:enigst / die wölle verschaf
fen / das sie ih:er Eh:en wider ergenzt / vnd dero wegen
vernügt werden / angesehen / das kein grundt noch schein
der warheit in gedachten an:klagen / Vnd ih:re Ma:iestat
klärlich vtheilen vnd erkennen mag / das ermelter Herz
Pr:inz / vnd seine Mit:erwandte / niemals einigen für
satz gehabt / noch jemals in sinn genommen / etwas wis
der dero Person / oder derselben land vnd leuth fürz:inea
men / vnd das allein die Religions sach / vnd die vorsteh
hende noch sie gezwungen hat zur wehr zu greiffen / ih:
leib vnd leben zu erietten / Vnd ob sie wol alwegen güte
mittel vnd gelegenheit / sich also eilends z:uersamen /
wie dann jetzt erscheint / Haben sie doch dasselbig ehe nis
thün wölten / dann wie schon das frembd Kriegsuo:lt
im land gewesen / vnd nicht dazumal / wie sie seidt vier
oder fünff Jaren her vielmals bessere mittel vnd geles
genheyt gehabt / ohne alle verhindernuß einen bösen
anschlag zur volziehen / da sie solches ih: im willen ges
habt.

Vnd dieweil der anlaß aller deren z:witterachten vnd
- verbitterungen / so zwischen den vnterthanen ih:er Ma:
iestat stehen / von wegen der Religion fürnemlich her
flusst / vonn den erklärungen / auslegungen / *Restrictionibus*
vnd *Modificationibus* , so vber das Edict des friedens
gemacht

gemacht worden / dermassen / daß in krafft derselben die
boßhafftige vnter dem schein eines vermeyndten eyfers
zu der Religion / sich vntersehen / das Edict auff alle
mittel vnd weg zu verkeren vnd kraffeloss zu machen /
also das ihme nichts anders / dann der bloße nammen
bleibt. Zu dem / leben sie stettigs in guter hoffnung / wo
sie etwan einen erforschen oder ergreiffen können / der
gemelten Erklärungen vnd Auflegungen etwas zu wis
der gehandelt / das sie dadurch in gemein alle Religions
verwandte als vbertreter anklagen / vnd nicht allein
darab vrsach nemen / sie der freyheit im Edict vergundt /
züentsetzen / Sonder auch sie vmb Lab vnd Leben / vnd
inn das eusserst verderben zübringen. So bitt dero
wegen Hohermelter Herz Prinz / vnd seine Mituers
wandte / ire Maiestat vnterthenigst / damit hinfüro der
weg allen diesen Nachforschungen / als dem vrsprung
vnd quellen aller empörungen / verhauwen vnd abge
schnitten werde / sie wölle die Übung der Religion ganz
frey in gemeyn / ohne vnterscheyd oder einiges vorbehal
ten der örter vnd Personen / vergähnen / Gleich wie der
Hochlöblichst seliger gedechtnus Keyser Carl / nach dem
Krieg den er wider die Teutschen gefüret / auch gethan /
vnd ihnen / ob er wol sieghafft / vnd oberhand behal
ten / vnd die fürnehmste Fürsten vnd Häupter in seinem
gewalt hette / gleichwol die Religion frey vergundt vnd
gestattet / welches ein vrsach / das nachmals in Teutsche
land friede vnd einigkeit biß auff diesen tag erhalten ist
worden.

Diueil auch das die Ritterschafft dieses Königreichs
sehr vbel züfridt vnd vnwillig macht / dz sie sehē / wie alle
Kupfer

Empfer vnd befelch / hohe wülden vnd gaben vnwür-
digen Personen außgetheylet / vnd gemeyne geringe
leuth / so keines herkommens / oder aber da sie ja vom Ad-
del / doch des kriegs vnerfarne vñ vnuerfuchte leut feind /
am nechsten zü der Kön. M. person befürdert werden.
Welches dann der Hochheit eines solchen grossen Kön-
nigs gar vngemeins / Derhalben ermelter Herz Pring-
auch die so hohe empfer bey d. Königliche Kronē tragē /
auch andere Herrn / vñ die vom Adel / so dem herren Pring-
zen zügerhan / ihre M. in aller vnterthänigkeit erinne-
ren wöllen / das es von wegen der wolfart irer M. hand-
lungen vñ dienften / auch deroselben hoheit / dienotturfft
erfordern thete / das man die Empfer vnd Wülden
nach dem werd vnd verdienst außtheile / vnd die ihenis-
gen die nechsten vmb des Königs Person seß sein / die
desen am besten würdig vnd verdient weren. Dergleis-
chen auch / das man verordnete / das die Amptleuth der
Königlichen Kron / vnd andere Herren / so befelch ha-
ben / vnd derselbigen fähig feind / ihre ämpter vnd be-
felch selbs verüchten / ohn das sie jemandes derselben
für sich selber anmassen oder eindringen dörfte. Gleich-
cher gestalt auch / dieweil gemeinlich der vnterthänē ges-
müter verendert / vnd von ihren Herren enteuffert wer-
den durch verachtung / mistrawen / vnd vngleichheyt /
so man gegen ihnen helt / So wölle ihre Mai. damit sie
vnter dere vnterthänen keine spaltung noch trennung
machen / vnd beide theil zügleich verderben / vnd so wol
die Religionsverwanten als den andern theil zü friden
stellen / damit sie hinfurtan Keyne enderung noch nes-
werung zü begeren / verursacht werden: gleichheit mit
ihnen

Ihnen halten / vnd den einen theil so wol als den andern
ohne vnterscheid der Religion / zün ämptern / stenden /
vnd wörden nach dem ein jedweder qualificiert vnd ges
schickt / lassen kommen / alsdann werden alle argwohn
vnd misstrawen auffhören vnd hingelegt werden / vnd
Keyne andere sorge oder nachdencken vberich bleiben /
dann wie ein jedweder vermög seiner Religion / sich zum
besten besleisse / so immer möglichen / Ihret Maiestat zü dies
nen.

Letztlichen / dieweil auch an allen orten / die Stens
de dieses Königreichs / sich in gemeyn / sampt dem ar
men volck beklagen / vnd züm hefftigsten beschweren /
das sie vntertrückt vnd verderbt werden / mit vntreglis
chem last / vnnnd vberlast / neuen Auflagen / Steuer /
vnd vnleidlichen scharzungen / die von tag zü tag auff
gehoben werden / vnd sich täglich mehren / ohne einige
Kriegsnoht / noch erhebliche vrsach / oder nötige außgab
vnd kosten / sonder allein durch finantzen vnd geltgeitz
etlicher außländischen / vnd sonderlich der Italianer er
dacht werden / dieweil sie in diesem Königreich so wol
daran / vnd grosse gunst vnd glauben haben / aber sol
ches alles zü grossen nachtheil deren vom Adel / wels
che zü allen zeiten von solchen anlagen vnd beschwerden
gefreyet gewesen / aber jetzt fürnemlich auff sie gelegt
werden / ohne das solches zü einiger ablösung vnd bes
zalung des Königs schulden / oder in seinen nutz ges
wendet werde / Sondern kompt allein etlichen leuthen
insonderheit zü gutem / so sich vmb des Königs Person
verhalten / vnd doch eines schlechten Stands vnd ger
ringen herkommens seind / vnnnd wie die Eglen eines
D jeglichen

Jeglichen haab vnd güte auffaugen / daher sie in kurzer
zeit so gar reich worden / vnd ein solchen oberflüssigen
schatz / vnd vbermefsiges vermöge zu wegen bracht / das
nicht möglich / es müssen solche Reichthumb gar ver-
decktig sein / Vnd bereden die leuth / sie bieten die hand
solchen Schatzmeystern / dadurch sie grausame grosse ge-
schenck vnd gaben zu wegen bringen / oder aber sonsten
der beuth nit zum wenigern theil genießen.

Derowegen Hohermelter Herr Prinz / sampt den
Herren / vnd denen vom Adel / seinen mitverwanten / ihre
Kön. Mai. vnterthenigst erinnern vnd bitten / sie wölle
die augen der barmherzigkeit zu ihn wenden / die ohren
eröffnen / vnd das schreyen vñ klagen ires armen volcks
genedigst erhören / vnd es der vntreglichen bürdien vnd
beschwerden entladen. Gleichsahls auch die von der
Ritterschafft / welche sich sehr beschwert befinden / ihrer
gewonlichen freyheyten / vñnd erlassung aller anlagen /
wie sie die jederzeit bey K. Kön. M. vorsehen gehabt /
gnedigst lassen genießen.

Vñnd damit diese Erinnerung desto besser auffge-
nommen / verstanden / vnd bedacht werde / vnd man wis-
theilen möge / wie wichtig diese sachen seyen / vnd was
sie auff in haben / vnd ihre Mai. der warheyt desto besser
berichtet werde / vñnd schawen können / ob auch einige
privat affect oder verbitterung mit vnterlauffen / vnd
wo die her fließen / So bitten K. M. vnterthenigst der
Herr Prinz / auch andere Herrn / vnd die vom Adel sei-
ne Mitverwandte / das sie derohalben eine freye Ver-
sammlung der Stende dieses Königreichs / wölle las-
sen zusamen beruffen / vermög der alten Sagungen /

ordnung vnd gebrauch / wie etwan zuzeiten vnd offter-
mals geschehen ist / in der gleichen fällen / die auch auß
geringern vrsachen entstanden / damit auß gemeynem
raht der Stende eine gute Ordnung vnd richtigkeit
möge auffgericht / vnd diesem vielfeltigen vbel / vns
raht vnd jamer / durch gepürliche fürsichung möge vork-
kommen werden / auff das auch der geiz / vnd das vers-
chwoenden im zaum gehalten / vñ die hend deren / so des
Königs vnd der armen vnterthanen haab vnd gut
verzerren / vnd vnnützlich verthün / abgehalten vnd ges-
bunden werden.

Nachdem nun obgeschriebne Artikel / volgendes
tags dem von Lignoroles / so von ihrer M. wegen gen
Sanct Denys solche züentpfahen abgefertiget / seind vs-
bergeben worden / ist in zweyen tagen eben so wenig ant-
wort darauff eruolet / als auff ihre vorige Supplicatis-
on. Den dritten tag aber / hat ihnen ein Heroldt volgens
de abmanung vnd Citation an statt aller Antwort zü-
bracht.

Der Königlichen Maie- stat Abmanung.

Deweil niemandes dan vns al-
lein in vnserm od aufferhalb vnser Königreichs
gepüren will / Leuth in Rüstung oder ohne Rüstung
auffzumanen / oder sonst volck züsamen zü beruffen /
gelt auffzubringe / außschreiben zuthün / vñ offene brieff
vnd schrifftten zü publicieren vñ außzürüffen / den stadt
D ij vnd

wird regierung vnseris Königreichs betreffend / vnd den
gehorsam so man vnser Hohen Mai. schuldig ist / vnd
sonst mit vnserer vnterthanen keinen gemein sein kan /
wes Stands / würden oder wesens die seyen / welche
auch nicht können noch sollen einem anderen gehorsam
leisten denn vns / wens schon vnserer nechste blutsver-
wante weren / vnd die so die fürnembste Stend vnd
Eimpter in vnserm Königreich haben / welche alle vns
mit aids pflichten verbunden sein vns zü dienen / vnd
zü helfen vor meniglichen / vnd wider jederman / nie-
mand außgenommen.

Demnach wir dann vernommen / das ein groß
Kriegsvolck zü S. Denys / vnd an anderen vmblichen
den orten versamlet ist / vnd man sagt / das der Prinz
von Conde / der Cardinal von Chastillon / der Admiral /
D'Andelot / von Rochefoucauli / von Genlys / von Clermont /
von Amboise / von Saulx / von Boucart / von Bonchanaues /
von Piguigny / von Lisy / von Mōuy / von Sanct Phalle /
von Esternai / der Graff von Montgommery / vnd Vuis-
dame / von Chartres die Oberste Häubter vnd Fürer sein
sollen / (welchem wir bishero kein glauben geben kön-
nen / sondern sind viel mehr aller trew / vnterthenigkeit
vnd gehorsam von ihnen gewertig gewesen) Haben
derowegen wir vnsern fürnembsten Kriegs Herold dar-
zü erfordert / ihme aufferlegt vnd befolhen / alle obge-
melte vnd andere Herren / Edelleuth / vnd amptleuth /
was wesens oder Standts sie seyen / die mit den obge-
melten züstimmen / vnd ihnen mehr volck zü führen /
vnd vnserer Stett einnehmen / auch ihrent halben leuth
annemen vnd bestellen / abzūmanen vnd abzūfordern /
das

Das sie als bald vnnnd auff diesen vnsern einigen vnnnd
schlechten befelch/ sich zü vns ohne wehr vnnnd waffen
verfügen/ damit sie vns den gehorsam/ so von Gott ges
botten (durch welches gnaden wir in diese Regierung
vber sie zü einem König verordnet vnd gesetzt seind)
erzeigen/ oder aber/ ob sie in solche böse gefährliche ans
schlag bewilligen/ vnnnd ob sie die vorgemelte versams
lung die da geschehen seind/ vñ noch täglich mit grosser
beschwerden vnd vntertruckung vnserer vntertanen/
auch mit nachtheil vnnnd verachtung vnser authoritet/
vnd Königlichen Würden geschehen/ es sey gleich mit
gewehrter hand/ oder nit/ güt heissen. Gleicher gestalt
auch/ ob sie die außschreiben so publiciert werden/ vnd
vnterm schein vnd deckel des vermeinten gemeynen nus
zes außgehen/ sie seyen versigelt oder nicht/ für billich
vnd güt halten/ sich als baldt gegen vns erklären/ auff
das wir hergegen vns wissen der gepür züuerhaltē. Ges
schehen zü Loure in vnserm Königlichen Schloß zü
Paryß/ den 7. Octobris/ Anno 16. 67.

Also vnterschrieben //

Charles.

De L' Aubespine.

ROBERTET.

Hochgemelter Fürst/ vnnnd seine
mituerwandten haben solche abmanung vnd for
derung in aller vnterthenigkeit angenommen/ vnd dem
D iij Herold

Heroldt angezeigt / sie wolten ihrer Mai. darauff Ane-
wort zukommen lassen / welche den andern tag hernach
dem Heroldt zugestelt worden / also lautende / wie hers
nach volgt.

Supplication an die Kön. Maiestat.

Gnedigster Herz König / als wir
durch vielfaltige / glaubwürdige / vnd genügsame
zeugnissen bericht worden / vnd in erfahrung kommen /
welcher massen man sich mit treuworten hören leßt / vnd
mit was Rahtschlegen endelich beschloffen / die Kir-
chenordnung vnd übung der Reformierten Religion
abzuschaffen / vnd alle die so sich zu derselben bekennen /
gantzlichen zu vertilgen / oder auß E. Mai. Königreich
zu vertreiben / Auch alle Kriegsrüstung / vnd andere hier
zu beschehene Anstellungen wider vns vor augen gese-
hen: sind wir eufferster gefahr wegen / vns zu versams-
len / vnd nach dem Gesetz der Natur auff wege zu den-
cken / wie wir vnser Leib vnd güte / fürnemlich aber die
freyheit vnserer gewissen / beschützen möchten / wider vns-
seren willen / vnd mit grossem herzenleid getrungen
worden / Vnd damit wir zu E. M. ein sichern zůgang /
oder von vnseren Feinden / so derselbigen E. Mai. am
nechsten beywohnen / vns nichts zu befahrn hetten / ha-
ben wir vns ferners mit Kriegsrüstung versehen müs-
sen / vnd also an E. Mai. Hoff kommen wollen / anderer
meinung nicht / dann das wir die schmach / falsche list /
vnd

vmb aufflagen vnserer widersächer offenbarten/ auch
was groß vbel vnd verderbnuß ihre Tyrannische vnnnd
schedliche anschlege (die wir wissen das sie von **E. M.**
in solchen deren jaren vnnnd angebomer miltigkeit nicht
herfliessen können) mit sich bringen / jederman klärlich
bekandt machte/ Bitten hierumb mit zú samen gelegten
henden / vnd vmb Gottes willen / **E. Mai.** wölle vns
gnedigst zú lassen / das wir Gott (dem man fürnemlich
zú gehorsamen schuldig ist) frey öffentlich nach seinem
befelch vnd reinem Euangelio dienen / vnd ihn anrúffen
können / vnd hierinn allen vnterscheid der óiter vnd pers
sonen auffheben / vnd darneben auch gantzlich abschaf
fen die auflegungen vnnnd schmehlerungen / so dem **E.**
dict der Pacification zú gethon / Deren sich obuermel
te vnserre bößhaffte gifftige widersächer anderer gestalt
nicht gebraucht haben / dann das wir dadurch in die vor
rige empörung widerumb gerieten / vnnnd sie nachmals
solches zú ihrem fortheil auch ferners gebrauchen möch
ten / dieweil wir ohne solche freyheit des Gottesdiensts
nicht können leben / sondern ehe alle zú sterben entschlos
sen.

Ewer Königliche Maiestat wölle auch zú gem
müth führen / das gleich wie Gott durch seine güte **E. M.**
vber meniglichen erhaben / vnnnd dero selbigen zú dienen
vnd in ehren zú halten vns befolhen / Also **E. M.** auch
gnediglich vns vñ vnserre güter schützen vñ beschirmen /
Damit ein jedweder inn seinem ampt vnd berúff nach
eines jeden Stand vnd Würde anders nichts zú gedens
cken / dann wie er **E. Kön. Mai.** allen gehorsam / so der
selben nechst Gott allein eygnet vnd gepürt / leisten mö
ge.

ge/ vnd sich in deren dienften also verhalten / wie es ehrl
liebenden / getrewen vñ guten vnterthanen gegen ihrem
natürlichen Oberherren wol gezimt / vnd wir vns nicht
weniger als vnser Vorfahren schuldig / willig vnd ge
neigt wissen. Demnach nun / gnedigster König / wir
E. Mai. natürliche vnterthanen / alles was zu auff
erbarung vnderhaltung E. M. Hoheit / Standt vnd
heriligkeit dienstlich / zu verschaffen / so viel vns immer
möglich / schuldig sein / vnd aber eigentlich spüren / wie
grossen vnwillen etliche viel tragen / insonderheit / das
gemeyn volck / von wegen der manigfaltigen ohnge
wonlichen beschwerden vnd Schatzungen so ihnen auff
erlegt / vnd aber zu E. Mai. nutzen nicht gewendet wer
den. Dargegen auch betrachten / der Vnterthanen
wilfährigkeit / zu befestigung E. Mai. Königlich
en Kron höchlich von nöthen / Bitten wir gleichfalls
erinnern vnd vermanen E. M. vnterthenigst / sie wöl
len sich vber ihr armes volck vnd vnterthanen gnedigst
erbarmen / vnd ihnen ergezzliche miltierung widerfahren
lassen / Vnd damit E. Kön. Mai. merken vnd erkens
nen können / woher vrsprünglich alles diß vbel herfleusst /
Sie wölle (da sie es für gut acht) ein freye Versam
lung der Stend dieses Königreichs anstellen / welches
das einzig mittel ist / dessen die König / E. Mai. Hoch
löblichste vorfahren / so in ihrem besten alter / vnd zeis
tigen verstandt gewesen / sich in viel geringeren sachen
gebraucht / zum theil ihre Vnterthane damit zu ver
gnügen / zum theil ihren Standt vnd Hoheit dadurch
zu bestertigen / welches alles ihnen löblich nachgesagt /
vnd sie dadurch für hochuerstendige Herin geacht / auch
deshal

Deßhalben ihrer vnterthanen Vätter genennet worden.
Lezlich bedingen wir vns vor Gott vñ seinen Engeln/
das wir niemals gedacht/ noch in sinn genommen/ icht
was wider E. M. person/ noch derselben Hoheit fürzu
nehmen / sonder viel mehr / vñnd weniger nicht / dann
alle andere vnterthanen / E. M. sampt dero Fraw müt
ter / vñd Herren Brüdern / glückseliges zunehmen vñd
aufferwachsen / vñd alle wolfart von Herzen wünschen/
denē wir (so allein auß forcht vnserer feind vns versam
let haben) nach dem befelch Gottes / vñnd schuldiger
pflicht allen gehorsam gern leisten wollen / vñnd ihnen
zū gutem / vnser Leib vñd leben / gut vñd blüt / auff zū
opffern (doch dz vns der Gottesdienst frey gestellt wer
de / vñ wir in sicherheit vnser personen ohne gefar vor vn
sern feinden leben mögen) geneigt sein / so offte vñd viel /
wie vñnd wenn es E. Kön. Mai. solches von vns zū
begeren gefellich. Nachmals bitten wir vnterthenigst /
E. M. wölle diß vnser begeren in besten verstehen / vñd
auß angeborner miltigkeit dem selben gnedigst statt ge
ben / auch vns alle / die wir von der Ritterschafft vñ ande
ren Stenden / in güter anzal bey einander seind / deren zū
diensten / mit leib vñd gut gnedigst lassen befolhen sein /
vñd den schedlichen anschlegen vñd rahtgeben gedachs
ter vnserer vñd Ewerer Kön. Maiestat Feinden kei
nen glauben geben / dieweil sie von wegen ihres eignen
nuzes / E. Mai. Königreich inn eusserst verderben zū
setzen vorhaben / wie es dann / so fern E. Mai. vnser
hülff nicht annemen / an dem ist / dafür der Allmechtig
Gott E. M. gnediglichen beschützen / vñd in glückseli
ger Regierung erhalten wölle.

E Als

Als nun die obgeschriebene Supplication dem Herz
vold vberantwort ware / in welcher hochgemelter Prinz
vnd seine Mituerwandte / neben ihres lebens / vnd gü-
ter sicherhey / anders nichts begerten / dann die freyheit
des Gottesdiensts / nach der reynen lehr des Heyligen
Euangelij (welches schon durch die Satzungen der ge-
meinen Stende dieses Königreichs beschlossen / vnd
ihnen zügelassen were) Hat jederman ihz begeren so für
billich gehalten / das niemands zweiffelt / ihre Maiestat
würden darinn bewilligen / vnd also ein güter frid dar-
auß eruolgen. Den andern tag hernacher aber / ist der
Herz von Byron ohn einige schriftliche Antwort / wie
auch auff vorige Supplication / vnd vbergebene Artis-
cul beschehen / zü dem Hohermelten Prinzen von Con-
de / vnd seine mituerwandten kommen / vnd ihnen ange-
zeigt / das der Herz Connestable / vñ mit ihme die Herren
von Montmorancy vñ Cosse / beide Marschälck / vñ die
Herren von L' Aubespine , vñ von Froze der Königin fürs-
schneider / schon von Paryß mit ihnen züreden / vnd sie irer
M. meinung vñ willen zü verstendigen / außgezogē we-
ren / zü welchen der hohermelte Herr Prinz / sampt dem
Cardinal von Chastillon / Admiral / Andelot / vñ
Saulx / vnd andern Herren als bald gereiset / Aber von
wegen des vngewitters habē sie am selben tag vñ nichts
anders mit einander geredt / dan von den trübsalen / die
auß dem Burgerlichen Krieg entsprungen / vñ wie ein je-
der für sich selbs diese empörung zü stillen / vñ diß König-
reich zü erhalten helffen / gesinnet sein solt / Hat inen auch
des selben tags vorgemelter Herz Connestable ferners
vermeldt / vñ sie vertröst / das er den Frieden / wie es in für
güt

güt ansehen würde / zu machen vnd zu bestettigen vom
König macht vnd befelch hette / vnd was er machte /
das solte gemacht sein / vnd fest vnd stett bleiben. Ver-
zoge also die sacht bis auff den nachfolgenden tag / auff
welchen die vorgenante Herren fast zugleich an voriges
ort zu gleicher stund sich wider versamlet / Vnd hat
daselbst vorgemelter Herz Connestable zwey zelt / damit
sie desto besser vnd bequemer mit einander reden könd-
ten / auffschlagen lassen. Als sie nun daselbst bey ein-
ander waren / vnd weder von pferden gestigen / noch in
die gezelt eingangen / hat vorgemelter Herz Connestable
von der sicherheit / die man solt anstellen / auff das her-
nach keiner in andern kein mißuertrauen zu setzen ver-
ursacht würde / vnd bey einander in gütem frieden vnd
ruhe leben könten / wollen anfangen zu reden. Dar-
auff ihme Hohermelter Prinz / vnd seine Mituerwan-
ten geant wortet / das werenicht der Punct / davon man
solte anfangen zu handeln / Sonder es were von nöts-
ten vor allen dingen / zum ersten vom Gottesdienst zu
reden / vnd die Religions sacht vereinigen / welche aller
zerüttung vnd zwitteracht in dem Königreich / auch der
bösen Rahtschläge / so newlicher zeit wider sie berah-
schlagt worden / ein ursach were / Vnd diereil es Kunde
vnd offenbar / das die vorgemelte Erklärungen vnd
Modificationen / so dem Edict des frieden angehenck-
t worden / gegenwertiger Empörung ein ursprung wes-
ren / köndten sie kein ander Mittel ersehen / einen güten
vnd beständigen Frieden anzurichten / dann wann man
die Religion frey vnd offentlich zu üben / ohn einige
Restriction vnd Formalitet zuließe / welches sie schon
K 4 zwey


zwey oder drey mal ihre Mal. schrifftlich bericht hettten /
vnd noch kein antwort darauff empfangen. Hierauff
hat der Herr Conestable angefangen zu schreyen / das der
König das selbig nimmermehr zulassen noch gestatten
werde / sey auch so fern dauon / das der König inn sein
Königreich zwo Religionen anrichten vund dulden
würde / das er auch das Edict zu Orlens / anderer ge-
stalt nicht / dann das es allein ein zeitlang weren solte /
gemacht hette / weil es nur von wegen dringender noht
der zeit bewilligt vnd publiciert worden / dermassen / das
wann sie auff das Edict dringen würden / das es ewig
weren solte / würde der König ihnen solches nit bewillig-
gen / als der lieber mit seinē vnterthanen in vnfrieden le-
ben / dann in der genachtparten Fürsten feindschafft
gerathen wolte / welchen er allzeit zūuerstehen geben /
das er der meinung / die Catholische Religion inn sei-
nem Königreich wider auffzurichten. Vnder vor sei-
ne Person wolt auch dem König anders nicht rathen /
noch anders zu geschehen gedulden. Es hat auch vor-
gemelter Herr Conestable / viel andere solche reden / mit
zorn außgossen / alle dahin gelangend / als wann der
Gottesdienst kōndte verendert / oder vnterlassen / vnd
die Gewissen nach der Menschen wolgefallen / vund
nach ihren Prouisional Edicten / so bald sie dieselbige
endern oder cassirn wolten / als sie in zeitlichen dingen zu
thun pflegen / auch also in geystlichen hin vnd her kōn-
ten oder solten gewendet werden / Oder als wann es
billich vnd leichtlich zuthun were / einen jeden von seiner
Religion abwendig zu machen / Vnd fürnemlich / dies
weil es der König so lange zeit zūgelassen / mit seinen
Edicten

Edicten bestetiget hat / vmb also ein grosse anzal ihrer
M. vnterthanen / allerley Stands vnd wesens auß des
re zulaß vnd bewilligung / in gedachter Religion vnters
wiesen vnd vnterichtet worden / zur Ehe gegriffen / ges
taufft / vnd die Sacrament empfangen / auch ihrer Ses
ligkeit mittel vnd weg bey derselben Religion gesucht /
darauß gegründet vmbd gesetzt / vnd dieweil auch vor
gemelte Religion vomb den gemeynen Stenden dieses
Königreichs (auff welche das ansehen der Regierung /
die noch heutigis tags weret / gegründet) ist bewillig
get worden. Also haben sie ihr gesprech verkürzt / vnd
abgehawen / dieweil sie gar nicht einerley meynung / vnd
auch der Heri Connestable solche vnbilliche vmbd freche
reden trieb / seind sie von einander gescheiden. Vnd
dennäch er zu seiner widerkunfft von dem gesprech an
hoff / an statt das er der Kön. M. trewlich referieren
vnd erzelen sollen / was zwischen hochermeltem Prinz
zen / auch vorgeannten Herren / vnd ihme / sich verlauf
fen / hat er ihre sachen verdecktig vnd verhaßt zümach
en / derselben zu verstehen geben / vmbd an vielen ande
ren ortē außgebreitet / wie sie keine handlung leidē / noch
mittel des friedens eingehen wolten / vnd nichts anders
dann dem König Gesatz zugeben / vnd ihme nach seiner
Kron zu greiffen sich vnterstünden. Solche vnd and
dere erdichteredē / die der warheit gar nicht ähnlich / hat
er von ihnen außgeben / nach der gewöhnlichen art vnd
weiß der Practicanten am Hoff / welche nit wollen / das
man trew noch glauben halten solle / wenn es vmb den
gewalt der Regierung zu thun ist. Zu dem auch / die
weil ein falsch vnuerschampt geschrey inn der Statt

Paryß vnd an vielen anderen orten dieses Königreichs
ist außgebreitet worden / als solte Hohermelter Prinz /
vnd andere seine Mitterwandten / zur mehrer versiches
rung die Statt Metz vnd Cales / auch ihrer Mai. Brü
der einen zu geiselen vnd vnterpfande begert haben / So
seind sie verursacht worden / diesen warhafftigen Bes
richt / ohne einigen zusatz an tag zu geben / damit ein jes
der die warheit klärlich erkennen / vnd von ihren thaten
recht vritheilen könne. Protestieren auch hiemit vor
Gott / das sie nichts liebers / dann einen gütten vnd bes
stendigen Frieden wünschen / vnd das sie nicht von wes
gen einiges ehrgertz / oder bösen affecten sich zünersam
len bewegt worden / sondern mit ihrem grossen hertzleid
darzú getrungen vnd gezwungen / Vnd haben ihnen
doch kein ander ziel / dann den reynen Gottesdienst vnd
ihrem König zu gehorsamen / auch erledigung des Ar
men volcks / vnd dieses Königreichs rube vnd frieden
zu befürdern fürgesteckt / Vnd seind dessen gewiß / das
alle Fürsten vnd Potentaten dieser ganzen welt / auch
alle menschen / so von Affecten ledig / vnd diese hand
lung verstehen / wol werden vritheilen können / welchem
theil man die vrsachen dieses gemeinen trübsals vnd
verwüstungen / die noch hinfürs darauß eruolgen kön
nen / zümessen solle / Ob sie denen / die sich gegen ihrem
Fürsten vnd Herrn vnterthenigst verhalten / vnd in sol
che noth / ihre eh / leben / vnd güter / sampt der freyheit
ihres gewissens zu beschirmen getrungen worden / das
sie endtlich / wie auch das gesetz vnd ordnung der Na
tur vermag / ihre letzte vnd einige zúflucht vnd rettung
darinn suchen müssen / wie sie gewalt mit gewalt wider
stand

stand thun / vnd mit dem Schwerdt sich verthedigen /
vnd ihr Leben fristen möchten / Welches sie also bald
abzulegen vnpüttig vnd bereyt / so fern man ihnen nur
etlicher massen leidliche vnd billiche Mittel fürsclaa
gen werde / dadurch sie vielgedachte freyheit ihrer Res
ligion / vnd sicherheyt ihrer Person erlangen vnd erhal
ten mögen / Darumb sie vnserthenigst gebetten wöllen
haben.

Oder aber denen / die wider Göttliche vnd menschs
liche Recht / sie in diese eusserste noht / jamer vnd ellend
getrungen / es sey gleich auß freyem mütwillen / oder
ihren ehrsüchtigen anschlegen / vnd den außländischen
Fürsten / welche dieses Königreichs jeder zeit abgesag
te Feind sind / vonn welchen auch der mehrer theil auß
ihnen Pension vnd dienstgelt einnehmen / ein gnügen
zuthun / vnd auch noch in solchem iren bösen
vorhaben verharren / vnd einen so noth
wendigen friden mit aller macht
verhindern / vnd
verwerffen.





Faint, illegible text, possibly bleed-through from the reverse side of the page.



208 / 773

GOS: VLT06824





112
K08

R

2511.
20 mm. 62.
K08 112/65

D.
à Cond. 4
30 %

01.

